

TANEE PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Jesucristoocua tiuujiaca

¹ Janiyari Pabloni. Silvano, Timoteonio, canaari nio naajiya niaacuarani, puetunu Tesalónica tiacajinia quiniaa parta Pueyaso pueyarajanaa. Nio naajioneeri niaara, canapue te pa Que Pueyaso rupuejacacuajani, pa Jiyaniijia Jesucristo rupuejacadanio. ² Pa Que Pueyaso, pa Jiyaniijia Jesucristojuhuaaj, nojori cuaara nioojia cumaqui-iria. Cuaara nia jiyateera juhuajaniya quijiacarajuhuaaj.

Pueyasoori na tojitianu paniyashijiaca saniitioriquiano Jesucristo tiuquishacariuhua

³ Cuarta Pueyaso pueyanaa, canaari jiyano hua nia timitiaani jiyano hua Pueyasoocua tiuujiaca nia quiniuucua socua, panitioajuaca nia quiniuucua socuajuhuaaj. Cunora, canaa secojosacari Pueyaso, canaari pueyaracaanu na sequequiaani, “paacarasho”. ⁴ Naa maninia nia quiniuucuatej, canaari shuquiriaatia poojotaquiaa niajanijajiniji Pueyaso pueya maapue niquiara tamaquiicua canaa rucanejosacarini. Canaari nojori poojotaquiaani taa nia rejeretaquiaa juhuajaniya naquiya nia miiniuni, taraatia nia miiniujiuhuaaj, Pueyasoocua tiuujiaca nia quiniuucua. ⁵ Pueyaso saquiriojonuucua niajanijia pueyaracaanu shuquiriaatia quijiaca nia quiniuria na shuriucua, cunoori maja najuhuana quiquiaari. Niaacuajaari seetanujuaana na pueya. Cunoori maatia niishishiyacuaja juhuajaniya nia rejeretasacari naquiya nia miiniu, Pueyasoocua nia tiuuniuucua. Pueyaso niishiyashijiaca pueyari naa

naquiya miiquiaa nijaniyatej, Jesucristoocua tiuujiaa nia quiniuucua.

⁶ Naajaa, Pueyasocuajaari tojetaarucujanaa sesa miyashijia. Nojuajaari niaacua naminiutianiya noo pojori, naquiya miitajaca nijaniyatej. ⁷ Nijaniya saniniuujia, naquiya miijiosaaquiaarini, niaari canaata samaraatanutaniyajuhuj, Jesucristo tiuquishacariuhua pocua. Jiyacaritij, nojuajaari niqushaanutaniya mani rimianuqueyano tiuquitiohuano, jiyanohua cumaacaraca na seyata jiyocuacaanuji. ⁸ Tiuquiniutianihuari na saniitionura noo pojori, canapuate Pueyaso niishiniu paniyaquiquiaani, noo pojorijihuhuj, pa Jiyaniijia Jesu rupaa ruuretajacatej. ⁹ Puetunu cuno pojorijianaari pueyaracaanu saniitosocoriquiano jiyatesaanutaniya. Nojoriiri tucuacaanura quejoosaanutaniya pa Jiyaniijia shuriucuaji. Naacuajitij, majaari nojori niquniu quiniutianiya na jiquioco, shacantuuca na cumaacanio, nojuaja jaara mijiria tiuquiriohua pa shuqiritianura nojuaja. ¹⁰ Jiyacaritij, puetunu na jeenucuasano pueyajanaari jiyanohua na timitianutaniya. Puetunu nocua tiuujiaa pueyajanaari jiyanohua jiuujiateconutaniya, pa Jiyaniijia na shootiatusacari. Niaari na niquniutaniyajuhuj, nojuajiniji canaa pohuatasanoocua nia tiuuniuucua.

¹¹ Canaari cunora pueyaracaanu niaacuara secojoquiaa Pueyasoni, maninia na pueya nia quiniuria, maja nojuaja caririquiniuria na saquiriojonuucua nijaniya. Canaari niaacuara secojoquiaaaniuhuj, Pueyaso cuaara nia tucuataniiria na cumaacata puetunu maninia casaa nia miiniu panishanojuanaa. Cuaara nia tucuataniiriajuhua puetunu nia miishanojuanaa, cuno, Pueyasocua nia tiuuniutia nia poonijiosanoni. ¹² Naacuajitij, pa Jiyaniijia Jesu uri socua timitiasaanutaniya naa nia miiniuucua maniniatej. Naajuhuj, nojuajaari nia timitianutaniyajuhuj.

Naa maninia quiniutianiyari pa Pueyaso pa Jiyaniijia Jesucristota na cumaquishacari niajaniya.

2

Maatia pohuatasano, taate mijiria quiniutianiyani, pa Jiyaniijia tiuquishacariuhua

¹ Quiarijiani cuarta Pueyaso pueyanaa, socua nia pohuatarohuacuara pa Jiyaniijia tiuquiniujiniji, taa pa coquetoanutaniya natajaniuhuj. ² Canaa sequesano niajaniya nia tojiri, pueyanaa. Majaari nia niyaje-tanu tariucuacaanu canaa niishitijosano niajaniya, nia jiyajeneyaquiniuucujaji tamasaca sapojosacari niajaniya. Majaari nia shiriiquiniu tamasaca jaara sequere nia-janiya: “Pueyaso Sohuanuuri cua niishitirii, pa Jiyaniijia tiuquishacariiri quiarijia”. Tamasaca jaara naa nia pohuatare, majaari na sequesano tojiniu. Naajuhuj, tamasaca jaara naajionuure tamajaaja, niaara na jiyateso-coriquiano juhua canaa naajionee, majaari nojori tojiniu. Nojoricuajaari nia sapojiya. ³ Pueyanaa, majaari niaacua nojori nia shanacunu nojori sapojonura niajaniya. Nia niishiri, pa Jiyaniijia tiuquiyaquishacariuhua, queraatia pueyari Pueyasocujaji pishiniutianiya. Jiyacarijiuhuj, Pueyaso rootasano Ruuretajajanaari supenuutaniya. Nojuacuajaari tariucua Pueyaso saniitiosocoriquiano na ririotaca. ⁴ Nojuacuajaari Pueyaso paraca. Nojuajaari puetunu pueyajanaa tenujunutaniya maja nojori tojini-uria Pueyaso, pueya shipinijosano nojori pueyasohuara nojori tarinitianurajuhuj. Nojuaja cutaraari tama na cuaqueyajaaja jiyatenutaniya juhua Pueyasora. Pueyaso Secojoua tiajinia cajiniutianiyari, Jiyaniijiajanaa cajitiu-jinia. Jiyacari sequenutaniyari: “Janiyacuajaari Pueyasoni”.

⁵ Pueyanaa, ¿majateeri nio nia niishiniucujaja? Janiyacuajaari nojuajiniji nia poojotajani niaata

cua quishacari. ⁶ Niaa naasucuaari niishiyacuaja canteeri juhua na quiaajaani, maja juhuanajuaja mijiria na miiniuria tama na panishanojuaja, Pueyaso paniyaquishacariija. ⁷ Seetanujuanaa, Sesaaca cumaacaari tari mijiria poonijiya jiyasohuaja. Naajaa, Pueyaso paracaari juhuanajuaja maja na naata muetanu, pueya niishiniuria nojuaja, na tenujuna cuaara niiquiji rishaarejaatijaj. ⁸ Na tenujuna jaara rishaare niiquiji, jiyacaritij cuno sesaaca sequeeri muetanutaniya, jiyanohua sesa na miiniuria. Naajaa, pa Jiyaniijia tiuquishacariuhua na shacantuuca cumaacajinia, nojuajaari cuno sesaaca seque monutaniya saaja na rupaata na nooniutia, na shaajanura puetunujuanaa. ⁹ Cuno sesa miiija sequeeri muetanutaniya Satanás cumaquishacari nojuaja. Naacuajitij, nojuajaari jiyanohua cumaaca jiitianutaniya jiyajeneta casaa na miiniuria, pueya jiuujiatenura nocuaji. Queraatia niishishoo casaa miiniutianiyajaariuhuj, pueya na sapojonura. ¹⁰ Nojuajaari puetunu tamaatia sesa miiniu niishishanojuanaa miiniutianiya na sapojonura noo pojori, canapuate saniitiosocoriquiano pueyacuajani. Nojoriiri sapojosaanutaniya, Pueyaso Rupaa ruuretajaca nojori quiniuucua. Nojoriiri maja na tojiniu paniniu quiquiaari seetanu rupaaajanaa, Pueyaso jiyanooniuria nojori. ¹¹ Naaratej, Pueyasoori nojori tarinitianutaniya nojori sapojosaanura, nojori tiuuniuria seetanujuanaa sapojonuunuucua. ¹² Naacuajitij, puetunu noo pojorijanaari saniitiosaanutaniya, canapuate seetanu rupaacuajanaa tiuuniu paniyaquijiani, sesa miiniu maniniucujaca nojori quiniuucua.

Pueyaso muerasuranoori tariucuaaanujiniji saquiriojosano

¹³ Niajaniya saniniuujia, niaari pa Jiyaniijia panishano pueyacuaja. Jiya shipiniyaquishacariija, niaacuajaari tariucua Pueyaso saquiriojosano pueya quiquiaari. Niaari

Pueyaso pueyara quiquiaaricuaja, na Sohuanu jatanini-uucua niajaniya quiarinio pueya nia quiniuria, seetanu rupaacuajanaa nia tiuuniuucua. Cunora, canaari pueyara-caanu Pueyaso sequequiaa niaacuarani, “paacarasho”.

¹⁴ Canaa pohuatasacari Pueyaso rupaa nia niquiara, ni-aari Jesucristoocua tiuquuaari. Naacuajitij, Pueyasoori nia jiyatequiaari na pueya nia quiniuria, shacantuuca quijiacara nia jatanishaanura, taa pa Jiyaniijia Jesucristo quiyacuaani.

¹⁵ Naaratej cuarta Pueyaso pueyanaa, majaari nioojia nia niquijiotenu Pueyasoo cuaji. Naajuhuj, nia numaama nia racatare canaa niishitiojosano niajaniya niaata canaa quishacari, canaa naajioneecajinia canaa rootasano nia-janiyajuhuj. ¹⁶ Jiyanoojia pa Jiyaniijia Jesucristo quini-uucua, pa Que Pueyasojuhuj, nojoriiri pa paniquiaa. Naajuhuj, poojia cajitiquiaa pueyaracaanuraari. Na ru-paacua pa tiuutiquiaariiri, pa niishiniuria paari jiyano-hua maninia miishaanutaniya pueyaracaanuni. ¹⁷ Naajuhuj, nojori cuara nioojia shiniujiiria, maninia nojori tojitia-jaca nia quiniuria pueyaracaanu. Nojori cuara cumaqui-iria niajaniya, tojetaarucuajanaa maninia nia sequesano quiniuria, nia miishanonio.

3

Pueyaso rupaa pohuatanaacuara pa secojore

¹ Pueyanaa, socua nia sequerohuacuaraj. Canaacuara nia secojore, pa Jiyaniijia rupaa paaquetesaanura puetunu tiqiyocuajanaa. Nia secojorejuhuaj, cuno rupaa pueya tojishacari, nojori jatanishaanura, naatej, taa na jataniquiaari niajaniyacuaani. ² Canaacuara nia secojorejuhuaj, Pueyaso cojuanura canaa na tojiyashijiaca pueyacuaji, maja nojori miiniuria sesa canaa. Niaacuajaari niishiya, puetunu pueyajanaari maja na tiuuniu Pueyasoo cuaj. Cuno pojoricuajaari

canaa paracaajiaca. ³ Naajaa, paacuaajaari niishiyani pa Jiyaniijiacuaajaari na sequesano miiquiaa. Nojuacuaajaari nia cumaquiniutianiya, maja nioojia nia niqijiotenura nocuaji. Sesaacaacuaji nia cojuanutanijajaariuhuaj. ⁴ Pa Jiyaniijiaacua canaa tiuushacari, majaari canaa taacanuunu niaa naasucuaari canaa rootasano tojitiaaquiniutianiya. Maja. Niaa naasucuaari na tojitiaacuaja. ⁵ Pa Jiyaniijia cuaara niishitiiria nioojiajnina, panijia nia quiniuria taa Pueyaso paniyacuaani. Naajuhuaj, cuaara nia niishitiiria naquiya miiniu rejeretajaca nia quiniuria, Jesucristo cumaquishacari niajaniya.

Poonijiojuaca pa quiri

⁶ Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniucua, canaa nia tojitiare. Majaari noo pojori nia rupeenu: taajecoritij, noo pojorijihuaj, canaa rootasano tojiyashijiacatej. ⁷ Niaacuajaari niishiya taa quijiaca canaa quiquiaari niaata canaa quishacarini. Naa quijiaca nia quirijihuaj. Majaari canaa taajeyaca canaa matanu quijiani. ⁸ Majaari najuhuana canaa miaquenu quijia nia miaquesano. Canaa cutaraari pueyaracaanu canaa samareenuta poonijionujuaca juucani, niucuanio. Canaari naa poonijionuquiaarini canaa panishano canaa jitianura, maja que-naaja canaa taajetenura niajaniya, maja nia tacaatianura canaajuhuaj. ⁹ Pueyaso jiyaramiquishano pueya canaa quiniucua, canaa naata quiquiaaricuaajaari canaa panishano canaa mashiniquiniuria niajanijajiniji. Naajaa, majaari naa canaa miiniu quiquiaari. Canaari tama canaa juaashiquiacatajaaja poonijioquiaarini, canaa niishitiojonura niajaniya, poonijionujuaca nia quiniuria juhua canaajuhuaj. ¹⁰ Canaa quishacari niaata jiyacar-ijihuaj, canaari nio nia niishitiojuquiaarini: “Cante

poonijionu paniyaquiyani, cuaara miaqueteshiyaquiiria-juhuaj”. ¹¹ Canaari pohuatasaarucuaaajaaniuhuj, nooji-aqueya niajanijajinijionaaari juhuajaniya quiquiaa. Majanaari na poonijionuunu quiquiaa. Nojoriniaari noo pojori cushitiojoquiaa, poonijionuujuaca cutaratej. ¹² Pa Jiyaniijia Jesucristo jiyaramiquishano pueya canaa quini-uucua, canaari cuno taajecori sequeyani, nojori cuaara poonijionuura, nojori panishano nojori jiitianura.

¹³ Cuarta Pueyaso pueyanaa, teyano niajanijajinijio- iote maninia miijiacacuaani, majaari maninia miiniu nia tarinitianu. ¹⁴ Saniniuuja, cante nio naajioneejinia canaa sequesano tojinu paniyaquiyani, nojuaja nia niishiri can-tenojoni. Majaari na rupuenunoj, na caririquiniuria quenaaja. ¹⁵ Maja cutaraari nojuaja nia jiyatenu juhua nia paracara. Saaja nia nacasure cutara nojuaja, niarta Pueyaso pueyano na quiniuucua.

Pablo sequesano na naajio na tucuatasaari

¹⁶ Poojia cajitijia pa Jiyaniijiani, nojuajanaa cuaara nioojia cajitiiria pueyaracaanu, naajaa, niaa jaara taa miishaariquia. Pa Jiyaniijia cuaara pueyaracaanu jiitiaara puetunu niajanijajanaa.

¹⁷ Janiyari Pabloni. Cua saruhuatanura niajanija, jani-yari tama cua juaashiquiatajaaja nio naajiyani. Nia niquiri cua naajiosano, taamuecatenajoni. Janiyari naa puetunu cua naajioneecajanaa tucuatquiaani, cua sesa cua naajionuta. ¹⁸ Pa Jiyaniijia Jesucristo cuaara cumaquiiria puetunu niajanijajanaa. Cuaara naa quiiriatej.

Quiarinio pueyaso rupaa pa jiyaniijia Jesucristojiniji
pueyano rupaajinia

New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21
